

U V O D

Sadržaj (predmet) doktorske disertacije „Političko-ekonomske pretpostavke uključivanja zemalja jugoistočne Evrope u procese globalizacije s naglaskom na integraciju u Evropsku uniju“ definišemo pomoću centralnih kategorija „promjena“, „integracije“, „razvoj“ i „stabilnost“, a navedeno lociramo, odnosno istražujemo na dva nivoa: na teorijsko - metodološkom i na konkretno - istorijskom nivou, a sve u namjeri da sučelimo opšte sa posebnim, globalno sa regionalnim, te univerzalno sa pojedinačnim.

Na teorijsko - apstraktnom nivou, vršimo teorijsku i metodološku analizu i pripremu procesa istraživanja gdje smo postavili više pitanja kao što su: sadržaj dimenzija integrativnih faktora, kakvi su odnosi u takvim novim sadržajima, u kojim relacijama se iskazuju dometi savremenih društvenih teorija promjena, integracija, stabilnosti i razvoja - posebno teorije sistema, teorije društvenog relativiteta, teorije novog istorijskog ciklusa, šta karakteriše i obilježava organizaciju društva i u čemu je suština pozicioniranja Bosne i Hercegovine u integracionim procesima?

Sa teorijsko - apstraktnog nivoa prelazimo na konkretno - istorijsko područje i analiziramo i objašnjavamo političko - ekonomske pretpostavke i njihovu važnost u integracijama (regionalnim, evropskim i svjetskim) na nekoliko konkretno istorijskih lokacija: u Bosni i Hercegovini, jugoistočnoj Evropi i Evropi.

Na tako odabranim konkretno - istorijskim područjima istražujemo i mnogobrojne kulturno - istorijske sadržaje kao što su: promjena društva i promjena unutar društva; dosadašnji način vladavine; politička i ekonomska socijalizacija, kao i određene manifestacije i prilagođavanja zahtjevima i duhu savremenosti kroz regionalizaciju i globalizaciju.

Polazeći od hipoteze da uspješno uključivanje u svjetske integracione procese mora kao rezultantu sadržavati četiri komponente (političku, ekonomsku, socijalnu i kulturnu), da kombinacija ciljeva i primjenjenih sredstava ne smije imati za moto 'razvoj radi razvoja' (čitaj stopa rasta i ostvareni profit), nego odgovoriti na pitanje koliko je omogućeno jednom društvu da dugoročno funkcioniše na dobrobit svojih članova, tragali smo za pozitivnim i negativnim činiocima društvenih promjena.